

# Nuummi il. il. killilersuinerit pillugit Namminersorlutik Oqartussat nalunaarutaat

Nappaatit tunillaassortut akiorniarlugit iliuutsit pillugit Inatsisartut peqqussutaanni nr. 20, 12. november 2001-imeersumi, Inatsisartut inatsisaatigut nr. 1, 1. april 2020-meersutigut allanngortinneqartumi §§ 6, 6 a, 12 a, 12 b, § 21 b aamma § 29 imm. 2 aamma 3 naapertorlugit aalajangersarneqarput:

## Atuuffia

§ 1. Nalunaarut una illoqarfinni Nuuk aamma Upernavimmi kiisalu Avannaata Kommuniani nunaqarfinni ataani taaneqartuni atuutissaaq:

- 1) Tasiusaq.
- 2) Upernavik Kujalleq.
- 3) Nutaarmiut.
- 4) Nuussuaq.
- 5) Innaarsuit.
- 6) Naajaat.
- 7) Aappilattoq.
- 8) Kangersuatsiaq.
- 9) Kullorsuaq.

*Imm. 2.* Nalunaarutip atuuffissai pillugit imm. 1-imi aalajangersakkat Naalakkersuisut aalajangiineratigut annertusineqarsinnaapput. Taamatut aalajangiinerit inatsisitigut sunniuteqalersinniarlugit Naalakkersuisut qarasaasiakkut nalunaaruteqartarfiatigut saqqummiunneqassapput.

*Imm. 3.* Nalunaarut Kalaallit Nunaanni Peqqinnissaqarfimmut imaluunniit nakorsiartarfinnut kiisalu nakorsiartarfinnut namminersortunut niuertarfinnilu peqqissaannermik naalagaaffimmit akuerisaallutik ingerlatani ingerlatsisunut atorfeqartitsiffiusunullu atuutinngilaq.

*Imm. 4.* Nalunaarut katersuunnernut, politikikkut allatulluunniit isummersornissamik sunniiniarnissamik siunertalinnut atuutinngilaq.

*Imm. 5.* Nalunaarut eqqartuussivinnut atuutinngilaq.

*Imm. 6.* Nalunaarut ulluunerani neqeroorutunut namminersortunut pisortaniillu pigineqartunut, atuarfinnut, ilinniarteqarfinnut il.il. atuutinngilaq, nappaatit tunillaassortut akiorniarlugit iliuutsit pillugit Inatsisartut peqqussutaanni § 22 takuuk.

*Imm. 7.* Nalunaarut nammineq angerlarsimaffinni aaqqissuussinernut il.il. atuutinngilaq.

*Imm. 8.* Nunatsinni Nakorsaaneqarfik nalunaarummit immikkut akuersissuteqarsinnaavoq.

§ 2. Nalunaarummi matumani aalajangersakkat ilaat tamarmilluunniit inunnut inuiaqatigiinnut pingaarutilimmik sulialinnut atuutsinneqassanngitsut aalajangerneqarsinnaavoq.

*Imm. 2.* Inunnut Kalaallit Nunaanni Politiini sulisunut Kalaallit Nunaanni Politimesteri imm. 1 naapertorlugu aalajangiisassaaq.

*Imm. 3.* Inunnut Issittumi Sakkutooqarfimmi tassanilu immikkoortortaqaqfinni sulisunut Issittumi Sakkutooqarfimmi pisortaasoq imm. 1 naapertorlugu aalajangiisassaaq.

*Imm. 4.* Inunnut Peqqinnissaqarfimmi sulisunut Nunatta Nakorsaaneqarfia imm. 1 naapertorlugu aalajangiisassaaq.

*Init ilaannut taakkunungalu attuumassutilinnut nunaminertanut, kikkunnilluunniit iserfigineqarsinnaasunut tunngatillugu piumasaqaatit*

§ 3. Inuit Covid-19-imut tamakkiisumik akiuussuserneqarsimanermut uppersaammik takutitsinnaanngikkunik imm. 2-mi taaneqartuni inineqqusaanatillu taakkunungalu attuumassutilinni nunaminertaneeqqusaanngillat.

*Imm. 2.* Init taakkunungalu attuumassuteqartut nunaminertat kikkunnilluunniit iserfigineqarsinnaasut aamma nalinginnaasumik inunnit sivikitsuinnaanngitsumik isersimaffigineqarsinnaasut imm. 1-imut ilaatinneqarput, assersuutigalugu:

- 1) Sutorniartarfiit, cafiit, imerniartarfiit, diskotekit assigisaallu aamma tamakkununga attuumassuteqartut silami nunaminertat.
- 2) Kulturikkut suliffeqarfiit - tassunga ilanngullugit ilaatigut Kulturikkut Illorsuit, filmeriartarfiit, katersugaasiviit inersuillu saqqummersitsiviit.
- 3) Innuttaasut Illui assigisaallu.
- 4) Atuakkanik atorniartarfiit.
- 5) Illut iluini silamilu timersornermut atorineqartartut - tassunga ilaatigut ilanngullugit init timersortarfiit aamma Illorsuit Timersortarfiit, naluttarfiit, timigissartarfiit isikkamillu arsaattarfiit.
- 6) Nujalerisut, tagiartuisartut, pinnerartittarfiit assigisaallu.

*Imm. 3.* Init tamakkunungalu attuumassuteqartut nunaminertat tullinguuttut makku imm. 1-imi piumasaqaatinut ilaatinneqanngillat:

- 1) Init taakkunungalu attuumassutillit nunaminertat, ulluinnarni nioqqutissanik tuniniaanermut pingaarnertut atorineqartartut.
- 2) Allakkeriviit.
- 3) Mittarfiit.
- 4) Pisortatut oqartussani pilersuiffiusunilu init sullissiviit, saaffiginnittarfiit il.il.
- 5) Pisortat angallassissutaannut tunngatillugit utaqqsarfiit.

*Imm. 4.* Inuit tullinguuttumi allassimasut imm. 1-imi piumasaqaammut ilaatinneqanngillat, taamaattorli Covid-19-imut PCR atorlugu misissortinnikkut tunillanneqarsimannginnermik uppersaammik takutitsissapput sivilunerpaamik akunnernik 48-nik pisoqaassuseqartumik:

- 1) Inuit Covid-19-imut akiuussuserneqarnissamik Nunatta Nakorsaaneqarfianit innersuunneqanngitsut matumunungalu uppersaammik takutitsinnaasut.
- 2) Sulisut inini pineqartuni imaluunniit tamakkununga attuumassuteqartuni nunaminertani suliallit.

*Imm. 5.* Inuit marluk inorlugit ukiullit imm. 1-mi piumasaqaammut ilaatinneqanngillat.

§ 4. Inuit inatsisitigullu pisussaataitaasut pisinnaatitaasullu, tassunga ilanngullugit pisortani oqartussat suliffeqarfiillu, ininik § 3, imm. 2-mi pineqartunik pigisallit akiuussuserneqarsimanermut uppersaammik qinnuiginnissinnaapput.

*Imm. 2.* Imm. 1 naapertorlugu Covid-19-imut tamakkiisumik akiuussuserneqarsimanermut uppersaammik takutitsisoqarsinnaanngippat anisitaasoqarsinnaavoq.

§ 5. Inuit inatsisitigullu pisussaataitaasut pisinnaatitaasullu, ininik sumiiffinnillu § 3, imm. 2-mi ilaatinneqartunik pigisallit piumasaqaatinik makkuninnga naammassinnissimassapput:

1) Pisisartut, pulaartut assigisaallu § 3 naapertorlugu taamaallaat iseqqusaapput. Nakutilliinerup qanoq pisassaneraniq ilitersuutit Naalakkersuisunit saqqummiunneqarumaarput.

§ 6. Inuussutissarsiummik ingerlatalik politiit naliliinerat malillugu § 5-imik unioqqutitsisimappat, inuussutissarsiummillu ingerlatalik § 5-imik malinninnissaa ilimagineqanngippat, inuussutissarsiummik ingerlatalik inip piffissami aalajangersimasumi tamanut matoqqatinnissaniq politiit peqquneqarsinnaavoq.

§ 7. Inuk tamakkiisumik akiuussuserneqarnerata kingunitsianngua tamakkiisumillu akiuussuserneqarsimanermik uppersaasinnaappat inuk Covid-19-imut tamakkiisumik akiuussuserneqarsimasutut isigineqassaaq.

*Imm. 2.* Nunatta Nakorsaaneqarfiata akiuussuserneqarsimanermut uppersaatit sorliit akuerisaanersut aalajangissavai.

#### *Illoqarfinniit nunaqarfinniillu taaneqartunit angalanermi piumasaqaatit*

§ 8. Inuit § 1, imm. 1 naapertorlugu sumiiffinniit nunap killeqarfiata iluani sumiiffimmut allamut angalasut, Covid-19-imut tamakkiisumik akiuussuserneqarsimanermik uppersaammik takutitsissapputpput.

*Imm. 2.* Inuit tullinnguuttumi allassimasut akiuussuserneqarsimanissamut imm. 1-mi piumasaqaammut ilaatinneqanngillat, taamaattoorli sumiiffinni misissortinnissamut neqeroorfiusuni aallartinnatik Covid-19-imut PCR atorlugu misissortinnikkut tunillanneqarsimannginnermik uppersaammik takutitsissapput:

1) Inuit angerlarsimaffimminukarlutik angalasut.

2) Inuit inuiaqatigiinni suliasaqartitaallutik angalasariaqartut.

3) Inuit Covid-19-imut akiuussutissamik kapitinnissamut Nunatta Nakorsaaneqarfianit innersuunneqanngitsut.

4) Inuit § 1, imm. 1 naapertorlugu sumiiffinnit nuna qimallugu, nunatta killeqarfiata iluani pisariaqanngitsumik uninngaffiunngitsumik angalasut.

5) Sulisut tamanut angallassissummi pineqartumi aallartussanik atorneqartussanik sulisut.

6) Meeqqat marluniit aqqanilinnik ukiullit.

*Imm. 3.* Meeqqat marluk inorlugit ukiullit imm. 1-mi piumasaqaatinut ilaatinneqanngillat.

*Imm. 4.* Imm. 1-ip aamma 2-p maleruarneqarnissaasa qulakkeernissaa angallassissummiq piginnittup akisussaaffigaa.

*Imm. 5. Piffissami aallarfiusumi PCR atorlugu misissortinneq sivirusnerpaamik akunnernik 48-nik pisoqaassuseqaqusaavoq.*

*Pingaartumik inunnut Covid-19-imik siusinnerusukkut tunillatsinnikunut*

**§ 9.** Inunnut siusinnerusukkut Covid-19-imik tunillatsinnikuusimasunut PCR-ilu atorlugu misissortinnikkut Covid-19-imik tunillatsissimanerminnik uppersarsaasinnaasunut, piffissami uppersarsaatip atornerqarnerani minnerpaamik ullunik 14-inik annerpaamillu sapaatit akunnerinik aqqaneq-marlunnik pisoqaassusilimmik uppersarsaasinnaasunut tamakkiisumik akiuussuserneqarsimasunut malittarisassat atuuttut assingi atuutsinneqarput.

*Imm. 2. Uppersarsaat suna uppersarsaatitut akuerisatut atornerqassanersoq Nunatta Nakorsaaneqarfiata aalajangissavaa.*

*Qanermut imaluunniit kiinnamut assiaquteqarnissamut piumasaqaat*

**§ 10.** Inuit aqqaneq-marlunnik sinnerlugillu ukiullit qanermut imaluunniit kiinnamut assiaquteqassapput:

- 1) inini kikkunnit tamanit iserfigineqarsinnaasuni isersimagunik.
- 2) pisiniarfinni kiffartuussinermillu ingerlatsivinni sulisut pisisartunik attaveqarnerminni.
- 3) assartuutini kikkunnit tamanit ilaaffigineqarsinnaasuni, tassunga ilanngullugit bussini taxanilu ilaagunik.

*Imm. 2. Qanermut imaluunniit kiinnamut assiaquteqarnissamut piumasaqaat ilisimassutsimik annikillimasunut, timikkut tarnikkulluunniit sanngiitsunut, allamilluunniit peqquteqarlutik qanermut kiinnamulluunniit assiaquteqarsinnaanngitsunut atuutinngilaq.*

*Imm. 3. Pisiniarfinni kiffartuussivinnilu sulisut qanermut kiinnamulluunniit assiaqutit atunngikkaluarlugit pisiniat sulisullu akornanni plastikimik assiaqutit atorsinnaavaat.*

*Imm. 4. Qanorluunniit immikkoortumi 1-imi allaqqasoqarluarpat, peqqutissaqarluarpat qanermut kiinnamulluunniit assiaqutit ilaannakortumik tamakkiisumilluunniit peeqqaneqarallarsinnaapput, pisuni imaattuni:*

- 1) Nerinermi imaluunniit imernermi.
- 2) Nakorsaaitornermi.
- 3) Qarngit aalaneratigut atuaasartumik oqaloqateqarnermi.
- 4) Qanermut kiinnamulluunniit assiaqutit anersaartorniarnermut ajoqutaagunik ipianngulersitsippataluunniit.
- 5) Politiit kinaassutsimik uppersarsaaneranni

**§ 11.** Qanermut assiaqutit taaneqartut tassaapput qanermut qinngamullu assiaqutit ataasiartakkat imaluunniit annoraaminermi sanaat allunaasamillu tasisartumilluunniit siutitut ikkuttartut imaluunniit niaqqup tunuatungaani qilertartoq kiinnamullu attuumasoq.

*Imm. 2. Kiinnamut assiaqutit tassaapput isinut, qanermut qinngamullu assiaqutit plastikimik sanaat kiinnamut attuumanngitsut.*

*Inuit pillugit paasissutissanik suliarinninnerit*

**§ 12.** Nalunaarut una naapertorlugu inuup akiuussuserneqarsimaneranut inissisimaffia uppersarniarlugu inuit pillugit paasissutissanik suliarinnittoqarsinnaavoq.

*Pineqaatissiissutit*

**§ 13.** § 3, imm. 1-imik aamma §§ 5, 6 imaluunniit 8, imm. 1-inik immaqaluuniit § 10, imm. 1 unioqqutitsisoq pinerluttulerinermik inatsit malillugu pineqaatissinneqarsinnaavoq.

*Imm. 2.* Ingerlatseqatigiiffiit il.il. (inatsisitigut pisussaataasut pisinnaatitaasullu) pinerluttulerinermik inatsimmi kapitali 5-imi malittarisassat malillugit pinerluttuleringeq pillugu inatsiseqartitsinikkut akisussaatinneqarlutik pineqaatissinneqarsinnaapput.

*Atuutilersitsineq aamma atuunneranut piffissaliussaq*

**§ 14.** Nalunaarut ullormi 21. november 2021-mi atuutilissaaq nal. 08:00.

*Imm. 2.* Nalunaarut malillugu killilersuinerit, inerteqqutit, peqqusinerit il.il. 5. december 2021 tikillugu atuutissapput.

*Inatsimmi allami allannguinerit*

**§ 15.** Nuummi Sisimiunilu killilersuinerit pillugit Namminersorlutik Oqartussat utaqqiisaagallartumik nalunaarutaanni nr. 60, 29. oktober 2021-mersumi tullinnguuttut allanngortinneqarput:

1) § 8, imm. 2-mi "30. november 2021" imatut allanngortinneqassaaq. "21. november 2021 nal. 08:00".

**§ 16.** Piffissami 13. november 2021-miit 27. november 2021-p tungaanut Nuummi killilersuinerit pillugit Namminersorlutik Oqartussat nalunaarutaanni nr. 64, 12. november 2021-mersumi tullinnguuttut allanngortinneqarput:

1) § 13, imm. 3-mi "27. november 2021" imatut allanngortinneqarpoq: "21. november 2021 nal. 08:00".

*Namminersorlutik Oqartussat, ulloq 20. november 2021*

Kirsten Fencker  
Peqqinnissamut Naalakkersuisoq

/ Aka Olesen

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut